

Herremättli-Clique

*Als Schnytzge-Rotbart lobesam
Mit einem Wahn in's Trämli kam . . .*

Wenn aine mit em Schlapphuet protzt
und soziale Phrase kotzt,
Wenn aine Sässel druggt und findet
Sy Rootsheer-Ruehm syg dief begrindet
Will er in fuffzäh Kommissionen
E saftig Daggäld ka erflohne .
So aine mues jo schliesslig maine
Aer syg e Siech — und was für aine.

Wär Aemtli kumuliert und schaltet
Sälbständig und als Grossroot waltet
Wenn ain als Birgerroot und dichtig
Als OeKK — Verwalter wichtig
Sich macht — und duet als wär
Aer ganz allei e Hirsch - nur är
So aine mues jo schliesslig maine
Aer syg e Siech — und was für aine.

Was machts em uss, wenn Sässel krache?
Wenn z'Bärn me's ohne ihn ka mache?
Was machts em us, wenn au d'Regierig
Verzichtet uff sy roti Fiehrig?
s'gitt als no Aemtli für sy Alter,
Aer isch no BVB — Verwalter.
Aer isch nit abgsäggt, bruchsch nit maine.
Aer isch e Siech - und was für aine.

So aine mues jo schliesslig maine
Aer syg e Siech — und was für aine
Und wenn er au als Herr Verwalter
Als dimmer wird im hoche-n-Alter
Wenn ihm der Käs ins Hirni schiesst
Und wenn är sy Bedyttig gniesst
Wenn är verächtlig uff die Glaine
Dief abeluegt — waisch wär mer maine.

Der roseroti Schnytzge - Fritzli
Dä Volggstribun entglaist e bitzli,
Es heerebiggerlet em stargg
Im soziale Ruggemargg.
Für Greesewahnsinn und e Splyn
Gits zwor no gar kai Kranggeschyn.
Aer het e Kranket — und kai glaini,
Mir alli wisse, was für aini.

Aer sait, wenn är im Dram kutschier
Denn fahr är nit als Passagier.
Kai Billeteer sott ebbe welle
Ihn zue de blosse Fahrgescht zelle.
Aer syg der Oberbonz vo alle,
Me mies vor ihm uff's Ränzli falle.
Aer syg der Greescht vo alle Glaine!
Mir alli wisse, was fir aine.

Wenn d'Hand nit gschwind ans Käppli fasst
Wird jede Billeteer grad gschasst.
Wär vor ihm nit gnueg reveränzt,
Katzbugglet bis em d'Hose schränzt,
Und wär en gar nit kenne sotti,
Dä Lehr en kenne, ob er's wotti!
Es soll nit ebbe-n-aine maine!
Aer syg e Siech - und was fir aine.

Mir wisse Schnytzge; Dir e Sitzli;
Das wär e Blätzli fir e Fritzli :
D'Wäbstube soll e Sässel flächte;
Druff kennsch du denn als einzig ächte
Parteibiffelstier Dy Molli
Vergittret zaige loh im Zollii
Dert wärsch der greescht — und was fir aine
Du waisch ganz sicher, was mer maine.

**Und am Fasnachtzischtig goht me sälbverständlich
an d'Latärneusschtellig in der Baslerhalle vo der
Muschtermäss. Me het Zyt vom Morge-n-am nyri
bis z'Nacht am elfi.**